

## **ASO FARAILE 2 TESEMA 2022**

**Manatu autū:** AMOINA O LE FALE FETAFA’I (*Carrying the tabernacle*)

**Tusi Faitau:** Numera 4 : 1 – 15

Ui ina faavasega gatā taimi o le tusi a Numera, e manino o le tusi faitau mo le asō e faasino i taimi o le fesi’ita’i o le nu’u. A’e po’o fea lava e si’i iai, e ave ai foi ma le atola’au ma mea pa’ia lea na faavasega i le tusi a Esoto, ona ua avea ma vaega tāua o le olaga faa-Isaraelu o aso uma. O le faitauga la mo lenei aso, ua tōfia ai le fanauga a Koato le atali’i lona lua o Levi e gafa ma le feaveaina o mea ia. E filitagaga ē tolusefulu i le limasefulu tausaga le matutua, “*e o atu e auaua e fai ai galuega i le fale fetafa’i o le faapotopotoga*” (Numera 4:3). O le filiga e fua i le talitonuga masani, o le matua lea o le soifua (30–50 tausaga) e maatiati ai le malosi e lē gata o le tino ae faapena foi le mafaufau. Ua fetauī foi auā o le upu **auaua** ua faaliliu ai le upu e fetauī mo ē ua ofo ola e tautua i vaega’au poo militeli (military service). Lona uiga, e fili sui o le fanauga a Koato e mautinoa e gafatia le galuega. Ae le gata i lea, e manino pea le tofiga o le fanauga a Koato i totonu o le tofi o sā Levī, o le vaega’au po’o le militeli paia a le Atua.

O le faapea mai la o le autū, “**AMOINA O LE FALE FETAFA’I**”, e faasino i le amoina o le atola’au ua teuina ai mea pa’ia. Lona uiga e manatu le autū a minoi loa le atola’au minoi foi le fale fetafa’i. Aisea? Ona o le atola’au o le faailoga faa-le-tino pito maualuga o le iai o le Atua ma le nu’u, pe afai e leai ua lē uigā la ma lē tāua se fale fetafa’i. O le aano o le manatu o lenei aso, ia alu le tagata ma ave lona Atua. Ui e manino o lo tatou Atua e malaga faatasi ma i tatou, ae sili ona tāua pe a malaga ma le iloa o lo’o alu ma ave lona Atua.

E faapea lagona o Tavita na ia fatu ai le laina o se tasi o ana Salamo e faapea: “*E tasi le mea ua ou ole atu ai i le Ali’i, o le mea lava lea ou te saili atu ai; ia ou nofo i le fale o le Ali’i i aso uma o lo’u ola, ina ia ou iloa atu ai le matagofie o le Ali’i, ma ou saili i lona malumalu*” (Salamo 27:4).

Ina ua faasalalau i le itulau muamua o le nusipepa a Fiti fusuaga na auai le au lakapi a le Kolisi Faafaifeau a le Pasefika, fai mai le fautuaga a le Pule o le Kolisi – “Faamolemole aua le tu’ua i fafo outou laei fa’afaifeau ae o ma ave i totonu o le malae. Aua ne’i galo o outou o faifeau o le Tala Lelei”.

Ave lou Atua i so’o se mea ete alu iai. Na amo e le fanauga a Koato le fale fetafa’i ina ia iloa e le nu’u le auai o le Atua ma i latou. A’o le faamoemoe foi lena na amoina ai e lo tatou Ali’i le satauro, o Lana osigataulaga togiola ina ia manino i le tagata agasala, e faamaoni le Atua na te faamagaloina le tagata ua salamo. Ua faaalua i Lona toetu Lona manumalo, auā sa faatasi Lona Tamā ma ia, na Ia lē tu’una fo’i Lona Tamā.

♀ *O lau Afio lava le Atua le uiga ma le mafuaga o lo matou ola, matou te faatalitali pea i Lau filifiliga o i matou mo Au feau, ae maise Lou a’oa’o mai ina ia matou iloa ona galulue mo se vi’iga o Lau Afio. Faamanuia mai lenei aso ina ia fai ai ni o matou aogā mo Lau Ekalesia ma le Tala Lelei. Amene.*

\*\*\*\*\*